

# KUASA AGAMA DI PERSEKUTUAN TANAH MELAYU

Di dalam keluaran yang lalu saya telah menerangkan bagaimana mustanhaknya kita bersatu dengan menumpukan persatuan untuk meninggikan dan mempertahankan syiar agama Islam, menjalankan suruhannya dan menjauhkan tegahannya dan di dalam persatuan itu dapat kita bekerja menyusun perkara-perkara yang dikehendaki adanya untuk kita bersama dengan mencantumkan had-had atau langkah-langkahnya bagi tiap-tiap negeri masing-masing, menegakkan kedudukan dalam pertadbiran Jabatan-jabatan Agama dengan sokongan-sokongan kita supaya dapat berjalan mengikut kehendak-kehendak dan kemajuan-kemajuan yang diajarkan oleh Allah kepada kita supaya kita hidup aman dan damai dalam lingkungan kita- mengikut batas-batasnya dan menjauhkan daripada mengikut kemauhan hawa nafsu.

mendapat bahagian daripadanya.

## YANG MUSTAHAK DIBUAT

(Oleh Idrus)

Sekarang marilah saya cuba menggambarkan ke hadapan pembaca-pembaca apa dia pekerjaan yang kita kehendaki dijalani dan dilangkahkan oleh kita kepada tujuan-tujuan yang tersebut yang terletak di dalam lingkungan kita sahaja menurut berita-berita yang tersiar sebagai contoh, Perlis dikatakan telah mengadakan suatu-suatu ura-ura untuk memperundang-undangkan pungutan zakat harta kepada penduduk-penduduknya di sana. Di dalam beberapa negeri yang kita dapati hanya yang diperundang-undangkan ialah perkata mengenai dengan zakat fitrah sahaja sedang zakat harta itu tidak dikawal.

Telah banyak kejadian-kejadian bahawa seseorang Islam yang bermustautin di dalam negeri itu kerap kali mengeluarkan zakat hartanya kepada lain-lain kawasan umpamanya orang Indian menghantar zakat hartanya kepada saudara maranya di Indian dan orang Arab kepada saudara maranya di negeri Arab dan seterusnya pada hal yang demikian itu menurut pandangan saya, adalah salah dan adalah boleh disifatkan telah merampas hak orang-orang miskin di dalam negeri yang ia berusaha padanya dan mendapat harta-harta itu. Wang zakat itu tidak lagi menjadi wangnya bahkan ia hak orang-orang yang berkenaan yakni orang-orang telah ditentukan boleh

Sebagaimana telah terang diketahui bahawa mengeluarkan zakat itu adalah wajib dan sesiapa daripada mereka yang diwajibkan mengeluarkan zakat itu ingkar maka boleh dijalankan paksa atasnya dan sebab itulah sesuai benar langkah-langkah yang diambil untuk memperundang-undangkan pungutan zakat itu supaya sesiapa yang ingkar atau cuba mengambil hak orang-orang yang berkenaan itu akan mendapat hukuman.

Sungguhpun telah ada ketetapan-ketetapan yang tertentu bagi orang-orang yang diharuskan menerima zakat itu dan telah banyak kita mendengar dan membaca ketentuan-ketentuan ulama yang menetapkan apa cara yang menentukan seseorang itu boleh menerima zakat tetapi sayugialah kita memerhati bahawa tujuan-tujuan wang pendapatan zakat itu mestilah meliputi kehendak-kehendaknya iaitu memberi pertolongan-pertolongan kepada orang-orang yang berhajat dengannya dengan nama pertolongan-pertolongan yang boleh melepaskan seseorang itu daripada hajat-hajatnya.

Dengan kerana zahir bahawa cara membahagi zakat itu ialah perkara yang mengenai keduniaan sedang mengeluarkan zakat itu ialah perkara ibadah yang mewajibkan tiap-tiap seorang mengeluarkannya dan jika tidak mengeluarkannya hendaklah dipaksa.

Sebagaimana saya sebut tadi ulama telah menetapkan bagaimana diri seseorang boleh menerima zakat itu tetapi apabila kita perhatikan kepada tujuan-tujuan zakat maka fahamlah

kita hakikatnya ialah untuk melepaskan kepayahan seseorang. Jika umpamanya kita beri kepada seorang fakir sepuluh ringgit adakah yang demikian itu boleh melepaskan tanggungan dan bebannya – nisbah keadaan sekarang sudah tentu jawabnya tidak melihat kepada keadaan-keadaan disekeliling kita hari ini maka sangat perlu. Jika undang-undang zakat harta itu dikuatkuasakan, kita hendaklah menyusun pertadbiran zakat itu secara berperaturan yakni tiap-tiap pendapatan itu hendaklah dikumpul dan cara membelanjakan itu dibuat berpatutan yang boleh memberi manfaat dengan meliputi maksud dan tujuan zakat itu.

Misalnya pada tahun ini didapat zakat yang diuntukkan bagi fuqara dan miskin sebanyak dua ratus ribu ringgit. Daripada pendapatan itu hendaklah dibahagikan mengikut cara yang lama, sekadar sepuluh peratus dan yang bakinya disimpan untuk tahun hadapan dan apabila didapati kadar yang cukup wangnya maka hendaklah diadakan rumah-rumah miskin dan seumpamanya yang di dalamnya orang-orang yang berkenaan itu, jika ia tidak berkeluarga dikumpulkan di situ dengan diajar perkerjaan-pekerjaan yang boleh membawanya menjadi sara hidup untuk melepaskan ia daripada fakir dan miskin. Setelah ia pandai dalam pekerjaan itu hendaklah ia diberi pinjam modal untuk menjalankan usaha-usahanya yang dengan perlahan-lahan nanti akan diansurnya semula yakni sesudah usaha dan perkerjaannya jaya.

Jika umpamanya didapati di antara mereka itu yang mempunyai tanggungan yang banyak dan jika didapati umpamanya mereka itu daripada ahli-ahli ladang dan kecenderungannya kepada perusahaan banyak sedang ia tidak mempunyai kemampuan maka hendaklah orang itu mendapat bahagiannya iaitu diberi pertolongan umpamanya dengan langkah menuntut kepada kerajaan membuka tanah-tanah bahrū dan usahanya dimodali oleh wang-wang zakat yang tersebut untuk menjalankan usahanya sehingga ia terlepas daripada tanggungannya itu.

Satu misalnya lagi yang perlu ialah umpamanya perkerjaan-pekerjaan

perempuan-perempuan menjadi pelayan-pelayan itu tidak digemari dan pihak pelayan-pelayan itu memberi alasannya bahawa pekerjaannya itu untuk nafkah hidupnya kerana kalau ia mampu sudah tentu ia tidak akan mahu menjadi pelayan. Pihak Jabatan-jabatan Agama tidak gemar kepada langkah itu dan jabatan agama sudah tentu lebih suka mereka itu ditahan daripada perbuatan demikian tetapi adakah ia akan menderita dengan kerana tegahan jabatan itu? Sudah tentu yang demikian ini tidak adil. Sekiranya jabatan itu telah mendapat kuatkuasa berkenaan pungutan zakat harta maka sudah tentu untuk menyelamatkan mereka ada satu jalan yang lebih molek iaitu mengadakan tempat untuk melatih mereka umpamanya di dalam pekerjaan jahit menjahit dengan diberi sara hidup bagi sementara dan kemudian apabila ia telah pandai diletakkan ia di dalam sebuah syarikat jahit menjahit yang dikelolakan oleh jabatan itu atau lain-lainnya yang dalamnya ia mendapat gaji-gaji yang tertentu ataupun diberi modal ia membuat perusahaannya sendiri (daripada wang zakat) yang kemudian nanti apabila perusahaannya maju ia akan mengansur modal-modal yang telah diambilnya itu.

Selain daripada itu jika ia masuk di dalam syarikat sudah tentu syarikat itu akan mendapat pekerjaan-pekerjaan yang banyak jika berhubung dengan jabatan-jabatan yang lain yang akan menyerahkan jahit menjahit pakaian yang pada masa ini diserahkan kepada perusahaan-perusahaan luar.

Semua yang di atas ini, jika kita halusi ialah perkara-perkara yang meliputi kehendak memberi pertolongan yang melepaskan tiap-tiap seorang daripada nama fuqora dan miskin lebih memberi kesan dan memberi faedah kepada cara-cara yang telah dilakukan oleh kita beberapa lamanya. Demikian juga umpamanya atas perkara mualaf. Bahagian itu ditentukan bukannya hanya sebagai penggambar kepada orang-orang yang baharu masuk Islam tetapi wajiblah kita ingat bahawa yang menarik mereka itu masuk memeluk agama Islam bukannya terpengaruh kepada harta dan pendirian dan sebab-sebab itu bahagian-bahagian yang ditentukan kepada mualaf itu meliputi

kepada kehendak-kehendak iaitu tiap-tiap wang itu dibahagikan kepada cara penerangan dan dibahagikan juga kepada guru-guru yang mengajar mereka itu menjadi seorang Islam yang betul tidak kerana Islamnya itu hendak berkahwin dan sebagainya sahaja.

Sekianlah sebahagian daripada kiasan, menurut faham saya, yang demikian itu boleh dijalankan dengan tidak melanggar pengajaran-pengajaran yang tertentu sebab perkara pembahagian itu ialah perkara keduniaan yang Rasulullah telah membilangkan bahawa “kamu lebih tahu atas dunia kamu” dengan kerana itu maka saya berasa sangat-sangat gembira bahawa Perlis telah mengambil langkah yang cepat dan tepat, mengambil kuasa undang-undang zakat harta sebagaimana yang diberitakan itu, tetapi di sebalik itu adalah diharap bahawa cara pembahagiannya hendaklah berperaturan (*ber-organise*) yang boleh membawa dan menyelenggarakan kemauhan-kemauhan untuk menyelamatkan tiap-tiap mereka yang berhajat kepadanya.

Mudah mudahan tidak berapa lama kelak di Perlis banyak berdiri rumah miskin, banyak berdiri bendang-bendang yang dimodali oleh pendapatan zakat bagi orang-orang miskin dan berdiri syarikat-syarikat jahit bagi melepaskan perempuan-perempuan janda yang miskin daripada menjual maruah kepada berusaha dengan titik peluhnya dengan cara berperaturan dan seterusnya yang menjadikan, jika dijalankan tujuan-tujuannya mereka akan terlepas daripada kesengsaraan. Yang demikian ini patut juga digalakkan oleh pihak kerajaan oleh kerana dengannya akan melepaskan mereka daripada nama fakir dan miskin dan akan melepaskan juga mereka daripada pengaruh-pengaruh faham Komunis. Inilah dia satu pertadbiran yang sangat mustahak disegerakan hari ini bagi melepaskan seseorang daripada dipengaruhi oleh faham-faham yang berlawanan dengan agama Islam. Inilah dia pengajaran-pengajaran yang meliputi kehendak zakat itu diadakan adanya.



*Tengku Abdul Rahman sedang memberi ucapan di dalam jamuan Teh yang diadakan oleh UMNO Singapura pada 27 Februari yang lalu.*

(sambungan dari 9)

diambil daripada karangan-karangan Arab yang berdasarkan falsafah”

Tatkala menyebut bagaimana kemajuan orang-orang Arab telah meingkat tinggi di Tanah Sepanyol maka ahli sejarah Perancis itu berkata:

“Setelah dimenungkan apa yang telah kita paparkan itu maka telah bahawa bangsa Arab di Semenanjung Spain adalah satu bangsa yang terutama di antara bangsa-bangsa lain dalam kurun yang kesebelas bahkan tamadun mereka telah mangatasi tamadun orang-orang Eropah seluruhnya.”

(Lima perkara lagi akan dijelaskan dalam bilangan yang akan datang iaitu sebab kejatuhan bangsa Arab dan bagaimana ilmu pengetahuan mereka telah berpindah ke Eropah).

---

## GUA MUSANG

Perjuangan seorang perempuan Melayu dalam masa Jepun

Harga senaskah \$1.20 – Pos 10 sen.

Pesanlah kepada:

**QALAM**  
**356, GEYLANG ROAD,**  
**SINGAPORE 14.**

---